



西江志卷第一百六十七

藝文 記十五

明

南昌新建二縣社學記

李夢陽

社學者社立一學以教民之子所以養蒙斂才視化觀治者也自庠序教廢民之子蓋不復教之鄉而輒入其縣州府學其童子事未之習未知室家長幼之節而業已學先聖禮樂講朝廷君臣之禮矣按古制里有序鄉有庠民秀異者移鄉學於庠序庠序之異者移國學於少學諸侯歲貢少學之異者於天子學於太學少學者今縣州府學是已今既不教之鄉以為養蒙斂才之地而縣州府學勢又不得盡蓄其才如此而欲視化以觀治難矣是以治天下者憂焉縣必里立一

學曰社學設師斂才以養其蒙乃其師不曰予養蒙者也顧月徵其課金雞米酒食民之子或苦而不來則輒稟諸官勾攝而鞭笞之民見其師非惟不養也而又苦其子曰是役我也則潛賄其胥吏而脫其子賄者脫貧者萃其師必饑餓謝之去官者則顧謂人曰甚哉社學之於治乖也茲說行則民志愈惑相煽以成俗至莫可救解高皇帝嘗茲焉憂見其俗莫可救解又值天造之初直發艱哉之嗟而止正統間旣設提學之官又仰念高皇帝之憂之嗟也於是詔天下縣里設一學以教累朝相因於勅督學官也必茲諭之今八十餘年矣而天下之社學卒不興成化初提學江西僉事潮州李公力爲此刻石冀望然未聞繼其後者也今所學毀失亦盡矣古之制誠不宜於今耶抑天不欲復三代之治所謂有君而

臣非其臣哉夫先其近則遠可屆舉乎大則細易力規畫詳則循之可久予今俾先立社學於省城以爲十二府之望十二府各立其社學自爲其州縣望州縣又各自立於城市爲諸鄉都望諸鄉都學則先大鄉都以及其小此亦遠近細大之義也南新二縣者省城縣也今立社學一十六處曰民彝曰物理曰崇真曰洪恩曰高士曰奎章曰滄洲曰蓼洲曰通濟曰高節曰通真屬南昌曰思賢曰文奎曰修仁曰崇文曰崇信屬新建諸學附城外內布散而相錯余謂其官曰學精選教讀一如例復其身待之誠禮勿令徵課金雞米酒食而苦民之子勿使民以是爲役而潛脫之也教讀不才者黜之才者吾將舉而用於時又謂之曰自今非社學生其勿入其縣州府學曰此古移少學之意也於是學又設門子一給其

薪水或增屋以處其家室於乎其亦詳已亦直欲爲他府及州縣望之而行耳如此而猶有所不行其非予辜哉南昌社學始於知縣吳守正成之推官李先芳新建則知縣游璉之爲經營二縣社學者南昌縣學訓導達賓也今以其備細鐫之石下方立諸分司廳右

### 宗儒祠記

宗儒祠舊名三賢祠三賢祠者祠唐李賓客宋周朱二公者也故皆木主弘治間江西按察司僉事提學蘓公止模周朱二公像於中而遷李賓客主於別室及副使邵公爲提學則又以嘗從朱子講學於洞者十四人從祠之改曰宗儒祠十四人者林擇之蔡沈黃幹陳宓呂燾呂炎胡泳李燔黃灝彭方周耜彭蠡馮椅張洽也詳具書院姓氏志夢陽謹按宗本

也法也又尊而主之大凡爲之本而可法使其尊而主之者皆曰宗故山曰岱宗水曰宗海大君曰宗子家之嫡曰大宗皆言尊而主之又爲之本而法之也其學也則各以其趨而歸之者爲宗如史記道者宗清虛陰陽者宗羲和法者宗律名者宗理墨者宗墨而謂儒家者順陰陽明教化游文六經留意仁義宗孔子以重其言於道最爲高者是已夫歸而趨之者亦以爲之本而足法焉耳以爲之本而足法則必尊之以爲之主尊之以爲主則各是其是彼得與我鼎峙而各立於是吾之所謂宗者或幾乎熄矣故曰孔子沒而微言絕孔子沒百餘年幸而孟軻氏起焉孟軻氏沒千餘年又幸而周朱二公起焉自周朱二公起於是天下始了然知有孔孟之傳莫不趨而歸之夫然後吾之宗若山之岱水之海國之

大君家之嫡雖有不尊而主之者不可矣故曰周朱者儒之宗也且人孰不欲為聖賢然異境則必遷遷斯變變斯雜則流於清虛陰陽法名墨諸家故有始雖了然知孔孟之傳而終或入於禪者如游酢是也今學於斯者謁而見吾夫子及孟氏又見周朱二公誠惕惕若有省也曰吾何舍此而從彼於是流者歸雜者一變者定遷者還真猶趨嫡趨君趨海趨岱者之為是誰之力然哉故曰周朱者儒之宗也或問張程諸公不祠曰二公者此其過化之地而朱子實為章明洞學主則是宗也周倡之而朱成之也

### 廬山記

自白鹿洞書院陟嶺東北行並五老峯數里至尋真觀觀今廢有石橋自觀後西北行里許並石澗入大壑其傍有石刻

至元大德間呂師中刻也並澗路石漸巉崿數里至澗之鎖口羣峰夾澗峭立而巨石怒撐交加湍激石鬪旁有罅人偃僂穿之行此所謂白鹿洞也過洞復並澗轉北行數里至水簾泉水簾泉者俗所謂三級泉也然路過洞愈險絕行經鳥道石罅間人跡罕至矣水簾掛五老峰背懸崖而直下三級而後至地勢如游龍飛虹架空擊霆雪翻谷鳴此廬山第一觀也然李白朱子皆莫之至而人遂亦莫知其洞所顧輒以書院旁鹿眠場者當之可恨也斯雖畧見於王子充記然渠亦得之傳聞又以尋真觀列之白鹿洞誤矣自書院陟嶺西北行至五老峯下並木瓜崖西行則至折桂寺朱子嘗游此循嶺而南下至白鶴觀劉混成棲處觀背峰曰丹砂自觀西北行數里至棲賢橋橋跨澗孤危宋祥符間橋也澗曰三峽

石旰爛而魏怪鱗處淵潭碧黛激則泮泮橋旁有石亭亭旁崖刻錢聞詩詩自橋西並澗行至玉淵其澗噴湧來至此而穴石懸注聲如迅雷亦天下之壯觀也過此則棲賢寺今廢李白嘗寓此自棲賢寺西行萬壽寺有路通廬山絕頂可至天池逾澗北行則太平寺路也卧龍潭則在五乳峯下路仍自棲賢橋出澗口西行數里北逾重嶺入大壑始見潭潭亦瀑布注而成者潭口有長石磷磷起猶龍朱子常欲結庵潭旁今崖壁有劄字然嵐重晝日常黯黯出卧龍潭西行數里至萬杉寺寺當慶雲峯又西至開先寺有瀑布龍潭有雙劍鶴鳴香鑪諸峯有讀書臺蕭統李煜嘗寓此亦廬山一大觀也自開先西行十數里至歸宗寺寺有馬尾泉亦瀑布有紫霄峯王羲之嘗寓此洗墨養鵝皆有池寺前里許有溫泉自

歸宗寺西北行則至靈溪觀觀西為陶淵明栗里今有橋有吐酒石過此西北行則古柴桑地有鹿子坂面陽山淵明宅與葬處自面陽山北行可至圓通寺此一路予未之行予則自德安縣西轉山北東行至圓通寺寺對石耳峯前有侯溪元歐陽元有記宋黃庭堅亦寓此自圓通寺東行度石門澗登廬山尋天池寺度錦澗旁有錦繡亭路雖攀緣上然修整又林木鮮伐掘問僧曰禁山也路以曳御製碑開云行一里輒有亭路旁崖平處皆字蓋五逾亭乃至寺寺據廬山絕頂奉勅建者也鐵瓦而畫廊有銅鐘象鼓悉燬於火殿前有池仰出而弗竭故稱天池云是日晴晝秋高下視四海環雲屯絮望岷峩江南北諸山皆見然江與湖並細小難觀矣僧為指石鏡鐵船獅子芙蓉諸峯乃東至白鹿昇仙臺高皇帝自

製周顛碑高古渾雄真帝王之文然碑亭漸崩裂又東觀竹林寺刻非篆非隸周顛手跡也又東觀佛手崑再下遊東林寺觀虎溪又至西林寺觀塔東又至太平宮者卽御製碑物色周顛處也又東至濂溪書院又東十餘里至周子墓墓對蓮花峯自蓮花峯東行至吳障山過山逾石子崗相思澗並五老峰行則至白鹿洞書院此廬山南北之大槩也按至廬山有大嶺與九疊屏風號竒絕李白詩所云屏風九疊雲錦張今問人咸莫諳其處惟開先寺前有錦屏舖云

通濟橋記

羅玘

南昌江西會府也途之陸出於京師者由章江以濟登西岸行十里爲遞曰蛟橋西山諸溪巖谷之水會焉水之會溪故大以磯抵之互激齧射不可以舟宜有橋橋圯矣不知幾何

時獨其名存且以名遞名其遞橋固宜前有也其曰蛟者南昌澤國也相傳多蛟螭窟其下蛟所在岸乃善崩又何擇於橋橋圯有由夫亦無庸考其時之近且久也獨惜夫會府之孔道也王事之期程商旅負輓之不獲已者冬而朝涉焉龜瘵之不可忍也猶可也夏而滂馮焉死者十八九矣噫橋固不可一日無也夫以不可一日無之急而曠於不可考之久有志之士固宜有憤然者而卒未見有舉者何也豈真有所謂蛟螭者窟焉皆畏而莫之舉耶將世之因循者多視人之患漠然雖有一舉之者而且莫勝其百咻之者也今太守祝侯至三年政以次舉遂將破衆論爲之新建義官裘顯獨奮曰此民利也不可以勞吾守於是經始於今年秋七月壬子伐木于信伐石於鄱陽之山水船陸車以次畢集及其將事

有告者曰是宜以鐵投蛟之居蛟乃避乃瘞鐵於岸之底卧橋其上為空以行水者五高二丈廣殺高之六修視高五倍之上列石楹以憑臨盼者凡若干屋其東偏凡十楹守者室焉憩驂駐節於是乎在東西之道鏟隆實窪坦坦夷夷義井在右綽楔跨中無籍於官無斂於民以八月甲寅告成於侯侯至喜甚扁而名之曰通濟之橋志孔道也噫當不可考之久徂以莫之舉之習而能於五六旬之近成夫不可一日無之急且為人所宏達之觀而歷夫無窮之遠愜賢守欲有為而未及為之志不知於古人何如也意者世善之裔自與閭左異歟或伯仲唱和之有助歟余與其仲鴻臚鳳來善鳳來孝友好義聞於人人無媿為宋司直君之後顯亦宜然故有是作鳳來以書丐為記余因及之

### 搗石清隱記

搗石顏氏永新大宗以搗石清隱名其堂而走其子璽求記於予者隱君琦也搗石者相傳魯公刺吉時得異石於永新用以搗衣比名為御史石隨而亦以搗徹於禁中元宗取試之無聲也復歸之公聲如初公後四世孫永新令求石所出家焉而搗石之顏始此人以公故也率不敢蹈且藉豪奪吏不敢舞手以臨盜之過也不敢窺其門顏故得日以大而蔓延為北郭之宗君北郭之英也予未至其處謁君意永新當衡柳之麓山之虎蹲人立與泉之雪飛雷響貢奇獻媚於穹堂華屋間者四環而集搗衣石卧之地無見也然顏為魯人非茲石也永新烏有顏氏哉石非遭於公手則雖於此日發千砧盡和氏之璞也亦不過與歌姬舞女流轉於富貴之家



爲玩具耳矧搗衣之麤厲者乎且使茲石也搗於公家有聲若是焉移而搗於禁中亦有聲若是焉則徒充上方一物而已了無著於公也公之子孫雖令永新會代而歸宜矣又從而家之其得爲智乎搗石今雖有顏氏正與編氓等君而以搗石名吾詬之矣惟其喑啞於萬乘而獨見聲於公石亦靈矣哉有若真能別白夫忠臣暗主幾微禍亂之萌與昔之言於晉者類也而特非妖耳然則茲石之祥於顏明也凡天下之類當知重之矧居永新者乎若君者可謂知所重而不忘世守矣非汨汨於山泉間隱者也清秋月夕魯公有靈其亦來降斯堂而試聽搗聲乎宜爲之記君之有齒有德爲鄉大賓他善若雨露也進士王仲信李用獻方日與大夫士言之予可略也不書

### 王氏祠堂記

弘治二年十月金谿明谷王氏祠堂成其作自元年之十二月而統其事者廷懋也堂之廣楹六之門如堂之楹而高殺其四之一東西室各四楹器數齋滷庖庫具在礮石爲簷除四周如矩虛其中而甃之矢直砥平無興塵泥陰雨若霽闔宗升堂奠位凝肅顧瞻羣主若見若語孝弟之心與涕俱生咸嘆曰舊徒吾祭不吾興感若是也鄉人之嚚嚚者曰甚哉王氏田入之饒成此其易也吾以爲不然夫王氏田入之饒孰愈於賜廟之家祿入乎吾遊京師見其藩則拔矣垣則夷矣碑踣而畜室焉者盡賜廟也問之其子孫不入是者幾世矣又其甚者曰是旣鬻矣俟其盡夷築爲它氏之宮也至其大第以居高軒以遊則殫其祿入焉以與戚幸者爭爲長雄

顧不少惜豈其力獨歎於一廟耶蓋其先世得無有貪功之過而濫及於非辜乎其不祀可坐而待也獨其子孫之罪哉而王氏者吾知之實自宋祕閣校理平甫五世孫彥遠居於此平甫荆國公之弟也當熙寧中一時小人皆附公敢行苛政以希富貴富貴公所柄也豈獨靳於其弟乎而平甫竟以不顯終其身要其心有切齒於公與小人之所為者此寬厚長者之風而為當世所竊笑然不知其固有可久而存者矣而彥遠又歸自金陵依故土以居其不忘本根又如此而公之子雱雱之死無聞焉小人之祀不祀蓋亦與貪功多殺者爭入於泯滅而已耳無足論也祠之所作庶其在此此天也夫豈牽於人力哉嗚呼人亦孰不欲祀安知貪殘苛暴者其不愈急乎而卒愈促觀於此祠亦可少熄矣其族彥斯誠至

是始克來請記吾以是為記亦公以為世勸云

永豐縣重修儒學記

鄒守益

初成化癸卯永豐縣新孔子廟一峯羅文毅公記之以為尊孔子以文莫若尊以道而世之學孔子者無異於優孟之學孫叔敖舉失其真其詞侃侃然至今讀之毛髮尚竦也嘉靖癸卯冬益適至永豐雙江聶子豹與鄉大夫士出貲議新學宮時中丞淨峰張公岳主其議柱史槐川魏公謙吉覈其成縣尹魏君夢賢經營締構以臻其績首文廟次明倫堂尊經閣次櫺星門次號舍次名宦鄉賢祠踰年告成林掌教應芳執訊諸生曰願以繼文毅之聲益不敏請繹聖學之真與二三子商之夫忠信與人同而好學與人異非聖之異於人也學失其真往往出於忠信之外故以訓釋為專門詞華為名

家著述爲功勳精神愈竭歲月愈邁而進德修業茫無與幾存義之實遂蹙然以聖爲絕德而弗可學二三子其亦攷於孔門功課乎所求乎子以事父所求乎臣以事君其天機惻怛非以正行也庸言有未信庸行有未謹終於龍德剛健中正有未純粹故有餘不敢盡不足不敢不勉兢兢業業不自滿假至於相顧慙慙而後快慙慙者非於忠信有加也不失其本體而已矣二三子反身而驗之庸言果信乎庸行果謹乎不足果勉乎有餘果盡乎諸君子向道宿方竟何功課其聖門閑僞存誠一大鑪錘乎建學立教所以進學者於聖也駿奔於斯陟降於斯詠歌於斯吾獨可以自棄自小已乎瀧岡金牛山川具在豪傑林立絃歌洋洋益不敏固宗國也願與二三子敬圖之

### 報功祠邢侯配享記

報功祠者報先師陽明王公功也配享者舉三湖邢侯珣以配公而與享之也公以功在宗社教在士類澤在黎庶嘗立祠於濂溪祠嗣政者謂弗虔也徙於郡邑學宮之右益偕同門俞尹大本祇謁遺像議隆報祀會晴江喻中丞莅虔臺慨然圖纘公之緒修厥廢墜以秩祀典復念贊襄成功邢侯預有勞而祠弗及以詢於士民士民協其議而林郡守功懋贊其決方憲副任覈其實遂列祀名宦而設像以配於公之側俾來徵言山房曰維公之學與邢侯之政皆司成氏所濡染也其昭明貺以信於後益也有慨於中踰三十年矣往歲受學於虔時方勦橫水破桶岡平泃頭郊野樂業商賈四集而成人小子橫經講學歌詩習禮雖雖文物之盛暇日以通家

西江志 卷一百六十一  
謁三湖於郡齋歷詢親冒矢石規畫章程衆譽歸重焉逆濠  
之變益復在軍門樟樹誓師西山搗伏豫章復城黃石俘馘  
公扶疾冒暑鞠躬盡瘁攬羣策以戡巨憝而邢侯與松月伍  
侯赫然爲稱首吉兵將北侯麾義勇陷陣遂斬賊帥以褫逆  
魄厥績尤偉焉功高謗興羣憎交煽權姦勢闖朶頤封拜將  
陷公於不測而嗾以焚掠爲同事罪聖主御極爵賞始及公  
而侯竟以叅藩陟左轄致其事公辭爵力爭之至有虛受陞  
職實畀退閒阻忠義而快讒嫉反不若觀望引避可以安享  
富貴無衆口之誹誠不忍叨天功掠衆美獨受殊賞以覲顏  
面聽者爲之汗背而竟無所濟未幾而公之爵亦褫矣益嘗  
告執政曰死忠死孝自是臣子降衷豈以賞不賞爲加損而  
國家礪世磨鈍亦使乘風雲附竹帛賞延於世以爲鼓舞之

具試評江西功次何似安化而賞罰黯闇豪傑疑沮異時南  
征北伐奚以爲軍旅法程此事自關國體非一一家恩澤計  
執事善其言而未改豈待時而發耶肆茲中丞闡幽振鬱順  
物情以勸有功而監司至於郡守縣令敦古舉義應若桴響  
充是操也秉鈞軸幹化機別淑慝樹風聲罔俾黯闇疑沮以  
蔽懿德將式克前休叙欽成烈以聞於無窮其兆是權輿矣  
益不敏尚執筆以俟

### 臨川縣改遷儒學記

臨川在撫州附郭以縣而學僻在郭外師生日議遷徙圯漏  
不葺適寶應以廢寺入官據城中之勝籍其材與產改作有  
羸而上橋寺僧覬其利眩以貨賄潛以請託而爲之力者復  
煽以浮言凡三改而三沮夫闢佛教以崇聖化於義至順也

徒敝學以入廢址而財力弗擾於民於政體至易也迺至於十年弗克就嘻其異哉督學事少湖徐公階奮曰古之人當世主尊尚異端猶倡為廬其居之說矧革寺汰僧德音屢下而因循若斯誰執其咎中丞浦南胡公岳燭羣姦以決正議而署郡事通判王侯暄夙夜綜畫之經始於嘉靖丁酉之冬越明年以成告維門將將維堂噲噲維廟翼翼維閣崇崇維齋舍穆穆縉紳耆耄改觀易聽咸以為天厭浮屠氏之汙而將起文明之運也亦惟休哉吾友明水陳子九川致少湖子之命命饒生庭祥許生源以徵言於南都日記有之凡學官先事士先志事之未克成官之責也事成矣而志未辨是諸士之憂也願聞所以詔之嗟乎士之尚志在孟氏有成訓矣良知良能上帝所降恒性必善猶水必下本非逆也孩提知

愛及長知敬達之天下無待外索本非艱阻也然而學術日僻德業日圯恒貿貿焉而靡所成將無亦有所沮乎剽經獵史琢句組章徼冒祿位耀身肥家其於貨賄類也間有嗤其陋矣以纂述為勛業以億中為實際假借舊聞依憑傳言其於請託類也間有察其非矣異同驅於流俗毀譽牽於時好前瞻後盼且進且卻其於浮言類也二三子其亦思自奮自燭自綜畫以求日躋於休哉今夫浮屠氏之學固亦不染聲利不縈聞見不怵利害翛然自以為明心矣而外人倫遺事物畢竟非天然自有之中而不免於自私自利故象山子接孟氏之傳直以公私為千古儒釋斷案夫非諸生之鄉先哲乎草廬子嘗記斯學矣曰洗濯舊染以涉聖涯與學宮俱新俾臨川為洙泗夫非諸生之夙訓言乎出入於斯陟降於斯

駿奔於斯藏修咏歌於斯肅然惕然須臾勿離庸德庸言慥慥相顧俾仁義之良充諸身徵諸邦家準諸四海垂諸百世庶幾無忤爾訓言無玷爾先哲無負爾良師良牧否則浮屠氏且反脣而哂之矣吁其蚤辨之哉是役也清戎傳公鳳翱首發贖罰三百金以相其成督學張公時徹協之郡守陸侯堂卜期鳩工而沮嗣是分巡趙公葉杖僧而籍其產郡守項侯喬撤廢像以請而復沮嗣是少湖公躬詣相度闢永豐倉空地佐之巡按陳公袞充之郡守丘侯其仁力承之為流謗所中而三沮於法當牽聯得記其沮者以隱弗書

### 宗藩義田記

白鹿洞於四書院尤顯南唐時給田以贍生徒考亭請額給書置田於谷源卧龍莊嗣是名卿碩流宣教敦俗四百餘年

歲拓代增計星子都昌建昌新建四邑凡二千三百餘畝而宗藩未有入者嘉靖乙卯秋饒藩永豐王朱厚燦以所置都昌柳氏田聚訟租額輸田於白鹿洞凡二百九十二畝歲入紫陽倉租穀計四百三十二石以養俊髦而杜爭怨當道議追償償確辭弗受於是分巡李一瀚以達於陳中丞洙吳柱史遵嘉其義行有司大書報國養賢四字以旌之而王判府思敬覈田畝佃甲填圖制籍仍鐫石以垂永久遣仵徵言於洞守益受而讀之歎曰是舉也昭三善焉高皇帝表正萬邦復二帝三王綱常既列聖熙熙嘉靖我萬邦天錫純嘏本支百世率履繩蹈矩輕利而競義見豐芑貽謀之臧焉藩封世祿徼福佛老捐厚貲重寶而弗靳茲獨隆儒重道誓守初志以靜言庸違為恥見好善擇術之端焉當道之始也追租給

償據法祛奸而終也旌淑樹風覈實貽久見敷政崇敏之周  
焉是可以詔來學矣二三子發軔之始敬事後食於三善可  
以無負尚有光於先哲其田畝佃甲勒諸碑陰

永豐六一書院記

六一橋在永豐縣治西百五十步以文忠公名文信國過縣  
書三大字懸諸楣其後好義者於橋置店一十二間建石橋  
菴於側以塑公像而召僧收租守之僧徒日繁改菴爲寺而  
公之嫡派遠居於潁遂無復奉烝嘗者嘉靖初年雙江聶子  
豹以柱史按潁求公裔孫歐陽雲給文回籍爲之授田置室  
督學少湖徐公助其義取橋店租給雲以供春秋之祀而寺  
尚屬諸僧僧徒混雜市井不遵清規爲諸庠生所呈撫按符  
縣覈實歸僧於龍迴寺而以寺址入官衆牒文佃當道靡適

從而僧乘隙以復業爲訟龍田張子言自臨桂莅邑博咨父  
老窮稽故實慨曰寺之興也肇於六一橋寺之廢也改爲六  
一祠茲非天造乎維六一公泰山北斗推諸昌黎垂紳正笏  
班諸韓富而百世之後巋然以從祀孔孟廟庭公之恒言曰  
死而有祠四世之間死而不朽百世之傳茲非自況乎請得  
改寺爲書院奉安歐文忠公牌位率諸生歲時俎豆之如中  
丞淨峰張公檄用以崇先哲風來學而一埽爭佃謀復之病  
柱史白湖胡公躋其策命估議修葺期成壯觀議上而柱史  
紀山曹公欣然報可督以終事適龍田子以風憲徵迺遴能  
儻工而亟礱石以來徵言雙江子復以告曰願有述以啓我  
邦人益也嘗稽諸方策矣公生於綿孤於秦從叔父於隨瀧  
岡歸葬時僅五齡歷四十餘年始以叅大政祔鄭夫人於崇

公之墓未幾入朝以老於頽竟未及再至今距熙寧壬子五百有餘年矣而鄉之大夫士眷然若子弟之慕父兄分符以莅肅然起敬若弟子之於師此非今世之所希將安能曠百世而相感耶敷求典刑明若觀火攷祥元吉悠悠我思其有能孤童自奮畫荻學字借韓文敗麓中慨然思並駕乎其有能力扶正類排斥險人夷陵滁州屢挫而不撓乎其有能館閣春帖舉筆不忘規諫以稱真侍從乎其有能卻柿木太平之文以抑祥瑞而戒侈心乎其有能疏拒羨餘防剖削而杜利門乎其有能矜恤脇從活二千餘命於片言閒乎其有能訓兒姪以守廉任勞至臨難死節亦是榮事乎其有能未及引年懇疏求退以全晚節而恥食其言乎駿奔詠歌懿德炳炳孰無倣規孰無磨濯繼自今通今學古濟時行道犯顏敢

諫瞿然不肯作嘉祐慶曆以下人物茲龍田子與雙江子所望於邦之耄俊也凡我成人小子舉敬圖之以無負鼓舞之典抑六一之義公所自命也外不悴於圭組內不勞於憂慮而道然以五物者自老雖響九奏於洞庭閱大戰於涿鹿不足以踰其樂其於世網俗籟奚啻枋鸞之視雲鵬哉然而猶有所待也試使書籍不展金石不集捐琴屏棋却酒而游於物之初公亦樂之乎古之人戒慎恐懼以建中和之極視於無形聽於無聲過化存神與真觀真明同運而並照乃為浩浩淵淵焉有所倚之學惜也予生晚不及就公而質之敬書以質尚友於公者

鳳林浮橋記

鳳林橋在邑之北郊西受瀘水東注於螺川暴雨時至奔放



兩涯南北行者望洋無所歸操艇者射利其間時或漂溺以食魚鼈異時邑令餞分宜令從者舟覆中流號呼求活兩令惋恨竟弗能措手聞者惻然無不悲之正德辛巳冬守益謀於先大夫之友劉君祚曰自宋以來橋幾廢興矣石之費可千金舟之費可五百金顧安所得金乎君謀於其友姚珙珙曰石雲僧本傳顏氏子年少而堅忍可使募之予曰可乎予嘗惡佛氏誘民膏脂傳之泥土甚至納諸烈火之中茲舉也異其常是吾儒惻隱之教也迺請於俞尹夔出贖金以倡之邦之庶士庶民各以其力助焉遂市石以甃兩涯市木為二十三舟市鐵為鎖以魚貫之闢通衢而屬諸北門凡用金二百二十五兩有奇越嘉靖癸未春以訖役告其財寡故物力薄其權微故歲月淹然本傳之力則已竭矣時予方北上京

師諾記之而未就也及來廣德本傳不遠千里冒盛暑以申前請曰橋之不廢繫斯文是賴君始之亦宜終之嗚呼予何愛一言以病吾邦人聞之父師曰惻隱之心人皆有之善充之則導利以利天下而天下之廣視如一家不善充之則壅利以自封而一家之近且視如秦越古之君子充其不忍人之心以布於庶政宅有桑田有疆鄉有塾庠川有梁澤有障若一家之耕織詩書門巷道路一事不底於績則戚然弗快於其心故以言乎其至誠惻怛溥博淵泉而不以私欲姦之是之謂天德以言乎其法式詳明匹夫匹婦期於各獲其所是之謂王政橋梁雖微王政必先焉夫分符以牧其土者將非民之父母乎比屋以食其土者將非其兄弟族黨乎父母之於子也其有坐視其墊厄而莫知省者乎兄弟族黨之相

睦也其有不同其好惡而獨享其利者乎利之行於世若泉之行於地也道利以利天下是決汝漢排淮泗潤及萬物而不竭壅利以自封則隄淫潦而激之其潰也必且傷人爲仁則慶爲富則殃千古簡冊炳炳可覆也繼自今良師帥克不忍之心以保赤子邦之父兄子弟克不忍之心以廣出入守望之愛上下相親貧富相恤大小相扶持體信而達順大同之道也一橋之費其忍使廢而弗興乎

### 尊道書院記

尊道書院在瑞州市南元妙觀右舊爲廣福寺正德間華林盜起寺僧與盜聯鄰郡守按之沒其廬以爲筠陽書院兵火草創僅存其名而無士以居嘉靖己丑改爲小學并其名亡矣丁未天泉潘侯自翰林左遷量移推郡政至則祛元克平

積逋廉積年教唆摘伏如神民大悅服迺詢父老稽故實知書院廢頽狀悵然以爲己任會署篆於袁未及輯理也旣歸自袁名實孚上下政騰薦剡令出子來進闔郡士嚴試之拔其尤六十人厚贈嘉筵陶養於書院書院無以居至借於元妙觀侯毅然振興鳩工市材咸樂義助正堂曰尊道示本也會堂曰同善協一也堂後爲正學祠祠周程張朱象山陽明諸大儒昭的也四齋兩翼創號舍六十餘間居肆之誼也合而樹綽楔曰尊道書院侯躬勤以導之規訓以貞之擇師以董之紀會以匡之時以稽之勸懲以勵之越三月而煥然落成士習津津侯復圖置學田立倉役門役與白鹿洞相悠久尤將濬河以爲襟抱郡之俊彥告於諸薦紳曰維茲元妙觀一道流耳高宮崇室金碧交輝所以尊崇其師者如或見之

吾聖人之道猶天然為吾徒者顧尊之不及老氏將怠與懾  
因之乎天假良侯以刑弼教以會於皇極是百世嘉績也宜  
勒堅珉以章往而範來祀東廓子發狀嘆曰富哉尊道之教  
乎二三子信以老氏之徒能尊其師耶尊以文弗尊以實是  
狎而侮之也春臺大牢熙熙欣欣遨遊醉飽莫知其所歸而  
致虛極守靜篤澹兮以為無味將孰識其真吾儒通弊則何  
以異於是廣廈細旃摘經獵史繩趨矩步嘉唐虞而樂商周  
其器與文足觀矣反而驗諸聖門果庸德之行庸言之謹慥  
慥而相顧否果博我以文約我以禮竭吾才而卓爾否果如  
臨深淵如履薄冰啟手足而知免否果戒慎不睹恐懼不聞  
致中和而位育否果非仁無為非禮無行孳孳為舜而自反  
否果能此學矣則德自我修道自我凝禮儀威儀無一而非

仁發育峻極無一而非天是為尊道之至待人而後弘若訓  
詁爾詞章爾經義爾記誦愈博辨析愈精執柯伐柯睨而視  
之其為狎與侮也滋甚學聖之要一在無欲定性之學大公  
順應至於先立其大而致良知不勦羣說不眩舊習雖所入  
有異而所趨則同其尊敬捧持充實光輝而不可禦此七君  
子者由此其選也勗哉潘侯貞率諸生夙興夜寐顧諟明命  
由七君子之塗轍以深造鄒魯而自得之無茹其華而落其  
實以為老氏所刺譏焉於以張皇國家化成之休而精光射  
於百世豈獨瑞之士擅其澤乎益客歲偕劉子邦采游匡廬  
取瑞以歸與況子維垣廖子暹切磋全生全歸之學而潘子  
篝燈連榻三宿不能別曰驂也亦願請事焉方延客書院規  
摹草創而別甫期成功敏捷如此非才與誠會何以感孚若

西漢志 卷一百六十七  
桴響耶夫勞力費財以建嘉績潘侯敬始之矣不勞力不費財以保茲嘉績而緝熙勿替諸師諸士盍相與敬終之

清忠祠記

周用

贛之祠趙清獻文信國以二公嘗知是郡故也嘉靖八年予奉命視師南贛諸郡間謁二公祠祠在郡門之西予謂其官屬曰二公生而仕於此南向以臨民沒而祠之以東向於義則未安棲公之神復不於堂而於寢於禮則未協盍圖之明年而改祠正位予曰祠其人既謀於禮而不悖則宜著其治行勤勞者以附公於祭法人之言曰清獻之清信國之忠古今之所謂清與忠者也則亦不可幾而及也是則然矣贛之為郡自漢至於今千幾百年郡之有長自晉太康以後其事業顛末不可考見與僅存名氏而未有稱述蓋亦多矣其間

風概氣節差可比擬者可直謂之無人哉夫臣之事君不易其介之謂清不有其身之謂忠二者非性成則必遷非勇克則無所於終此二公之所以不可及者人之秉彝好是懿德則不獨二公為然矣故嘗求之二公其言曰晝之所為夜必告於天不敢告者不敢為也其曰樂人之樂者憂人之憂食人之食者死人之事又曰義勝者謀立人眾者功濟故清獻再知蜀郡不作神羞簡於天子動容稱歎力爭新法而終於補外信國蒙大難而囚於燕市足不履所居樓下地者三年其篤信力行類如此是故不以辱加寵不以退榮進不以利妨義不以死易生志遂於當時烈垂於後世光明俊偉立乎萬物之表使人咨嗟嘆息以為不可及此豈偶然而得之者哉夫君子於時有遇不遇故於事有幸不幸時與事不在我

者也在我者處之得其道焉耳即使二公不遇於宋終身一介之夫與遇於宋而與六卿百執事雍容周旋行其所無事其能使之泯然無所成就而與衆人等哉予既懼夫人之不肯篤信力行而徒諉於所遇之幸不幸而卒無以善其道又深懼夫人之處於幸不幸之間顧望中立而無以自振也故因二公僭爲是說以詔自今之吏於贛者知所尊信俾贛之人世蒙其休澤以永其思焉

撫州府新創三賢祠記

湛若水

撫州三賢祠者太守曾君汝檀所創也經始於是歲閏月之朔凡九閱月而告成祠爲堂室者三而爲大門者一示異入而同趨也撫之士人咸欣欣以來樂觀厥成太守俾來請紀其事且以詔撫之人士焉甘泉子曰予何言哉在言乎哉在

諸君諸士之心已爾夫聖人之學心學也記曰人者天地之心此知道之言也何以謂人爲天地之心人物渾然同天地之氣氣之精靈者卽心心之生理卽性惟是一心一性非有別心別性故天地人物之氣之心之性一也如彼脂燈之火石中之火水中之火之光大者如日月之光非有別光也乃其精靈者之光也是故性者心之生理也故天地不能不生人人不能不生心心不能不生性或問道可傳乎白沙先生曰可自得不可傳張子曰知死而不亡者可與語性其幾矣是氣是心是性宇宙內渾然大家一物不能分以自私不能舉以與人無有同異無有彼此不待堯而存不隨桀而亡何傳之云所可傳者法爾開心知見之法爾開其蔽之者之法爾今撫州太守存心政教旣行鄉約爰祠三賢此心也巡撫

汪公巡按李公沈公皆可之此心也督學蘓公可之此心也其僚協贊之此心也人士樂觀之同此心也撫之三賢陸象山吳草廬吳康齋之學此心也象山先生立其大者深明宇宙性分之一契道體矣契此心也草廬先生博通羣經猶云可使不識一字之凡夫立造神妙明幾微矣明此心也康齋先生收斂沈潛過而自訟啓勿忘勿助之機見鳶飛魚躍之妙見此心也或曰敢問三賢之學安所似曰象山之學直詣高遠似曾點草廬之學測識超脫似子貢康齋之學確實謹嚴似曾子故一峰羅子曰康齋而有白沙功豈小哉曾點子貢曾子象山草廬康齋白沙諸賢同此天地之心也不能外天地之氣之性也故曰一也何有同異何有彼此人所造淺深異爾曰道莫大乎出處敢問三賢之出處安所似曰象山

之出處似柳下惠不卑小官必以其道草廬之出處似伊尹故治亂皆進五就湯桀康齋之出處似伯夷故不屑就已望望然而去之然而易地皆然矣夫三賢皆天地之心也皆為天地立心者也吾故敢叙心學之說以復太守記於石以與是邦及四方學士商焉

袁州修城記

嚴嵩

正德庚辰夏大雨袁之城壞太守江東羅侯輅始至議修之維時兵革甫息饑餽耗竭民用告病侯曰吾政未集而勞民不可乃已責弛禁均役清訟罷勾攝之卒節賓客之費是歲菑而不害稼有秋侯乃進吏士者民言曰惟設險守國繫城惟茲城壞掌故之令其責在予予曷敢不力乃進富民之義而才者曰爾其董而役植表定位析地計功惟協力程事以

西漢志 卷一百六十一 三  
章爾義名乃召匠氏而諭之曰工惟良惟堅無苟補塞頽漏以速弊無玩無怠苟以速弊與玩怠有罰乃用祝幣告於城隍之神曰實相厥成以利我民惟神之休閏秋之吉萬堵並作工徒子來侯識慮審確才敏而志銳始自隱度規費所出民弗知也比庀事之日板築之用畢具木石瓦甃填委山積百爾所需咸出計措無糜於官無病於民侯素精悍夜分規事罪罰所入一付工所秋毫不私佚道使民不俟督迫相貲出力罔有或後越三月而工畢君子以謂羅侯善爲政也維袁州古宜春郡其有城最號堅險昔人謂必知慮宏遠知地利者所成信然觀夫崇墉疊雉層樓周閣遠近迴合綿亘轟屹被以休阜阻以川坻隱然奧區也往時隣壤有潢池之變袁獨安枕無恐民纍纍然道相屬襁負而至曰袁有城可恃

也其形勢旣足相援其民亦樂於耕耨以自足土沃無外慕則淫巧不作故鮮爲盜長吏撫循誨誘治以禮義故常易使而事有成羅侯自南大理被命而來下車問俗濯其瘡痍煦以惠和民旣輯睦遂能用其力以爲茲役樹風聲而壯規度植利捍患垂之無窮雖有小警不能以病袁也然則袁之民其果可恃矣乎余觀侯仕未踰年百廢具興其考大成之樂於學飭祠於仰山觀兵於郊峙粟於庾思力變世吏之習以追古循良君子之風多可書茲役也民不知勞役不違時郡人之所欲書也故特書之且曰使嗣是者修其政俾無隳相是役者同知袁侯經通判朱侯祺徐侯麟法當附書諸執役名氏則列於碑之後

分宜縣新城記

昔在成周宣王中興其功烈盛矣而詩烝民韓奕諸篇於築城之事特詳焉想見其時君臣相與同心以憂天下之治所以設險防患者若是其悉也國家承平日久比歲倭夷作難數犯浙直閩粵間所至有城守者寇不能久持卽去其無城者標掠不忍聞夫城之有無其利與害較然可知也嘉靖庚申夏四月分宜縣作新城成袁守季侯德甫分宜令戴君廷志以書及城之圖來告曰願有記分宜舊無城正德壬申寇起瑞州華林邑民恟恟奔竄無所於庇始謀築城而吏苟簡從事以甃爲墉高僅丈餘厚不及三尺甚陋不稱雖名爲城實非可緩急恃也嘉靖戊午寇復起贛州遠近震恐兵部疏言郡縣皆當刻期築城惟時中丞吉陽何公遷適領巡撫江西之命曰是責在我何公學道愛人之君子也下車軫恤民

隱作新吏治勅所司毋敢慢天子之詔凡城若干處而分宜比舊址加闢之高倍其數厚乃三倍崇崇屹屹非復昔日之舊矣始者郡議或沮於無財或病於勞民何公親爲規畫財用取自公帑不煩民一錢之費用其力則計日受直發倉粟給之侍御史鄭公本立巡按茲土體國貞度與何公議克協旣而中丞張公元冲侍御段公顧言實來嗣任工有未竣二公又相與處畫適覩厥成戴令者專董茲役季侯總之經始於己未冬季而以辛酉之春訖工凡費白金爲兩三萬二百有奇夫古之君子事所當舉則不計其費知有以惠於民也役所當興則不恤其勞知有以佚於民也始也不免怨咨及其後也見德而忘其費享佚而忘其勞故曰難與慮始可與樂成若今始旣無所費於民矣又未嘗勞民民德諸大夫之



賜其有既耶此季侯之所欲有紀於後也予邑產也慶茲役之成父老子弟之有攸賴故叙其說以復季侯使刻諸石焉

南巖文公祠記

汪偉

吾信爲閩之門戶文公遊仕四方必道出焉故信之山水最爲所賞愛至今深山窮谷雖土人亦罕至而往往有公遺墨鷺湖以講道特顯南巖去郡治絕溪而南十里許公蓋嘗至焉景泰癸酉郡守四明姚侯堂得寺僧口識公五言詩一律又得公詠一滴泉詩一聯于郡學李訓導姚守謹錄而傳之二詩舊書於法堂之壁壁圯詩逸不存非姚侯之好事則墜地久矣成化庚子後守錫山談侯綱肖公像於巖間欲修祀事而未遑也嘉靖五年春巡按監察御史秦公亦四明人以瓜代弭節於郡偶偕守巡少叅張公懷僉憲鍾公雲端遊南

巖拜文公像賦詩二章以致嚮往因語署郡事同知葉君逢陽曰像而弗祀非褻歟對曰有司之過也乃議復其事雜徭民兵一人以顧役之資充春秋牲醴費有餘以飾祠宇庶事易集而可久秦公曰倅議是也葉君遂來請曰願文其事於石以示後俾勿壞予曰文公於吾人之功誠罔極也然不備觀羣言之蹟無以知公之爲勤不精思而力踐之無以知公之爲功膚學小生喜立意見未嘗盡讀公之書而遽疑焉而遽譏評焉斯道何由而明哉偉觀諸君子于先哲過化之地顧其泉石草木若召公之棠思封植之得其一字一句若伏生之書思表章之可謂篤信善學者矣其於風教之助豈小補哉偉所以累嘆息欣忭而不能已也敬書其始末以諗來者秦公名鉞字懋功起家進士爲御史風裁凜然出按江右

務持大體不尚武猛苛察而下益畏所至以訪民隱求賢才  
為急人服其得體葉君字子大文公鄉人由進士歷縣令有  
聲攝廣信同知稱廉敏云

褒忠祠記

歐陽鐸

臨江城之北門故有廟祀陳知軍元桂以知縣趙孟濟配報  
死事也按志元桂字華甫撫州臨川縣人進士歷官太府寺  
簿宋開慶己未元兵入潭鄂出知臨江軍時未有城籍民柵  
木以守制置使徐敏子軍金鳳洲觀望不進元兵薄北門桂  
力不支脇之降不屈與清江知縣趙孟濟俱死之事聞贈桂  
天章閣待制謚正節賜葬錢二十萬官其二子得立廟死所  
景定庚申廟成賜額褒忠北門蓋其遺址也姓訛謚逸易為  
淫祠不知何自起而莫有正之者正德壬申李君夢陽視學

至郡因諸生請始檄知縣楊麟黜鬼像立二公木主增飾規  
制以復厥舊又十有七年於茲廟日頽圯不治知府錢君公  
良顧瞻歎息加葺理焉弗侈弗損惟以可久余適道郡下與  
公良追論其事曰嗟乎北門之禍徐實為之也夫阨賊於藩  
其守在堂阨賊於門其禍在室元兵逾袁蓋已無臨矣擁兵  
自逸致賊於門而使賢者徒以其身當之不幸而不勝以至  
於死謂非其殺之也可乎哉封州之貶宋於是乎失刑矣予  
奪廢置並行而不倚如持衡然夫然後可以立國贈官易名  
賜葬任子立之廟祀報忠之典亦宜矣而無裒於宋之亡由  
刑失而愛死者相視也人臣之義太上無所為其次勸而善  
其次懲而善是故守為義則避者赧死為榮則生者辱事有  
相形者也而或易之苟避而誅則莫敢弗守矣苟生而誅則

莫敢弗死矣雖然吾豈敢以是概賢者哉褒忠之舉夫亦以爲世勸也由乎其類尚德者悼尚愛者思而耳目所及孰爲廟近乃今傾圮相望曾淫祠之弗埒悲夫嘗思之俗尚鬼而輕施輕施故興作時官尚法而重費重費則不免因陋就簡而況異代之事非法所急者耶公良治郡節用愛人視利如浼乃城峽江新府署工鉅費廣不自爲嫌吾問諸士民士民若罔聞知蓋亦自求諸心爾斯廟之修神其以爲厲乎知言者亦必諒余之非佞也

泰和縣補虛查隱記

語云興事孰與省事此言煩擾病民也然河海潤下載自疏鑿井泥而弗甃厥亦弗食是故省事莫如除病病除則利興夫然後能與民相安國家以六事察守令而賦役病民爲急

吾邑若尤有甚焉者嘉靖壬辰令缺攝承者奉新條均糧班役以利民也而人情警警豈惟曰慮始之難踰年冊成陳侯梅甫至愬者殆千百數侯稽冊籍攷其出入蓋失額者幾五千石嘆曰均糧乃至是耶久之得最要者六一曰無撒之弊二曰虛懸之弊三曰交徵之弊四曰措餘之弊五曰私補之弊六曰影射之弊始於里書而權於總算乃集十九人者面詰其故論以法比寬假轡策而與之期此十九人者所謂縣總者也皆寒心首服於是勾其私識以叅官籍使亭老監之各歸其虛凡百五十日而冊具慮其或謬也歲閏二月致邑人而質焉叅伍檢考咸誦言曰厲在總然歲月遠不欲浚求則取諸新墾而易者補之亦惟其自占不取盈焉凡得欺隱米以官計者一千一百二十五石有奇以民計者三千七百

五十五石有奇得補虛米以民計者六十五石有奇以稅計者  
二石有奇侯念非公直有籍人監之又將交私兆弊訪於衆  
以屬義民郭元暢竟事無愆乃告成於撫按藩臬若府咸嘉  
其勞績侯慮去而無證遠而弊生撮其凡目名曰補虛查隱  
冊付諸梓與戶符相表裏於是山谷之民不至邑而周知其  
數據實徵輸免於浮噬豈非人民之利哉或言總認米則是  
稱地則斂余曰譬諸盜諸所盜物具在主名不必皆是要非  
誣諸分物而充者或又言宜隨戶而歸曰此由不得其戶者  
侯姑數而責之亦將有待也嗟乎茲事也縣大夫昔屢有問  
者而竟無成甚矣積病之難除也余不與公家事邇緣家人  
執里役能言其利而鄉族昔不便今稱便者固非反覆亂常  
之民既以謝侯亦冀後之君子終厥美焉

### 台山古堰記

周志偉

密陂故在靖安安義兩邑之界其源一出靖安潦源箬源濂  
源一出安義株源皎源合流南行過遶田至台山始入吾邑  
西境又東行過台山分爲兩溪又分爲南北五圳至縣東合  
流入湖不知何時於台山之南決爲溪直趨大湖地勢中低  
橫奔汎溢東行溪圳往往斷流湮塞先年邑民歲約一人爲  
長率領子弟負樁草修築決口歲以爲常水得東流旱乾有  
備因稱沃壤立縣以來民多逐末往往修築不時一遇亢旱  
束手無策甲辰早乙巳又旱邑乃大饑志偉歸自蜀中因與  
李侯問及茲事侯憤然曰此吾志也次日躬自相視以陂當  
諸源之會而修築止於樁土宜隨築隨決遂議鳩匠易石爲  
經久圖乃檄吳君專理其事又擇有鄉望者分理之不踰月

告成功以石砌者長九十丈濶五尺疏圳五路灌田六百餘頃是時秋杪至冬無雨而水之分流於東日汪汪瀦蓄侯又導入縣諸渠於是農懼於野旅頌於途商歌於市而垂白之老咸涕泣語曰六七十年未曾見此蓋樂侯成之速而又悲侯來之暮相與走余乞言爲記陽山子曰余讀漢循吏傳見當時諸吏往往留意於桑柘溝洫之間未嘗不嘆其爲治有本今之名能吏者大都期會簿書而已故民於其來也颺颺然於其去也漠漠然侯治吾邑至誠存心愷惻爲政至水利尤加意必欲遺民千百載之計侯非古之人哉侯非古之人哉侯姓李名恒敷雲南大理人吳君名澧福建莆田人

東鄉縣城記

洪範

東鄉舊爲臨川之封域距治邑特遠數舍先是歲饑禁疏犁

鋤冥頑斬木揭竿風起爲厲一時司牧瞠目束手咸莫爲戢卒至移兵禽獮草薶而後山藪流移始獲安堵總制都憲陳公金暨諸藩臬重臣咸議增邑於臨之東鄉而益以進賢金谿餘干安仁之分地邑設官聯民治一新副使胡公世寧來奠茲土謂禦暴保民宜增城守因築孝岡爲東鄉邑治越數稔副使范公輅復勤保釐按視城日就圯罔以奠民遂下令重修築伐石陶甃費資出公因時齊力子來庶民若分財用平版幹稱畚築程土物議遠邇具餼糧罔不盡心越數月城蓋翼然屹然視舊增固邑之士民旣頌而感咸謂二公之功誠項背相望其遺澤雖世世不忘而擬峴之碑不可無記知予荒陋猶堪秉筆夫春秋凡城創始完舊雖時且義必書見勞民爲重務也江南諸邑舊多無城近增築者備盜也盜起

於民而原於上繁刑急斂實爲之招況教本化原俗吏久不  
之講欲民之無盜難矣盜起而滋熾雖金湯不足恃此又民  
牧大小所宜知也范公前爲御史按江右若預折強藩擊叛  
闡風節竒偉爲海內敬慕予辱知舊深其大行遠到諒有餘  
地而豐功茂烈宜銘鼎彝予雖偃蹇誠切私望城此一節未  
足爲公書也第邑人德公之誠不可虛辱知縣鄭溥將命惟  
謹賢勞足徵縣丞楊獻義官楊希震咸以能勤事者也並宜  
書之

萬年縣治記

吳昭

萬年新設縣也鄱陽餘干樂平貴溪四縣羈縻之地去縣遠  
政治疎故其俗尚頑頑則悍悍則治極而易亂正德歲丁卯  
兵戈大作貽害五六年都憲陳公金任公漢因議奏請作邑

於萬年峯之右今縣治之北名之曰萬年以轄之示矜慈規  
久遠也羣醜惡旣稔并縣治而焚毀之朝廷再命王師臨之  
又叛者無復孑遺惟餘順化者幾千而已公私廬舍皆缺都  
憲俞公率守巡諸公來相其地命叅政吳公廷舉綜理之於  
時披荆棘平高下徒傭之計財用之利錢穀之畫紀綱之設  
皆吳公之材猷也功緒已著而廣東布政之命下矣繼而兵  
備憲副許公庭光來終其事修其舊增其所未及日有稽而  
月有就招還流民賑窮餓立里甲勸農勸商作興文教許公  
之功爲多至於朝夕贊佐以成二公之事則饒之別駕莫君  
也料理之精密用度之撙節則縣署印丘君琴也若平道途  
若奠民居若均民間田業率民人以搬運瓦甃木石朝而督  
工焉暮而紀功焉以時而食工焉則縣簿吳君元著也雄規

傑制炳然一新於時諸耆老始相謂曰縣今其成矣羣醜叛而招招而復叛吾民逃性命奔走於他鄉每謂縣不可以再立無復田園墳墓之望詎意有今日乎此實朝廷惠顧我民諸當道善承上意我新縣官勤勞盡瘁之功也不遠千餘里遣人求記於予予謂之曰我國家開基之初天下之縣凡一千一百有六是後有所添設者皆以其姦民反側難制而齊民無以安生故設官置吏以撫綏之今爾縣雖成爾民奔亡流落之後財力亦甚疲矣自非居上者深仁厚澤有以回其元氣良法美政有以立其生全而槩以凡民視之甚者復肆其漁獵之擾則民困於亂政與困於亂兵同矣大非朝廷意也若夫城之基不可以不高池之水不可以不深文廟不可以不建許君自有成策後君子必有能善紀其事者

興安新城記

畢竟容

上御極之三十有九載詔設興安縣析壤附民命官建學諸事事一如所司議明年春知縣陳君慶雲至士民和輯居數月閩廣盜起流劫吉贛建撫諸郡而瞰縣之無城者輒肆剽掠遠邇恐動是秋有粵兵戍於閩者撤還乃於道塗爲亂窺犯玉山遂及永豐二縣官民廬舍焚蕩如赭興人益大震懼大中丞胡公自浙來首入吾郡究永玉不戒之由慨焉憫興邑之新建亟圖所以保衛之計命郡貳王君時拱相度城址凡工役之費督理之勤則檄陳君專任之顧縣依高山山皆巖石峻其平壙增其卑隘東西緣岡阜南遵河壩修築如式迤北則全因故山不假封纍約工力之所就者六百五十丈有奇而女牆堞口之類四面咸具各券一門以出入仍架樓

於其上郡守江公珍考厥成事經始於是歲之冬十二月而  
以次年秋九月訖工陳君介書於余曰賴公之靈民始有定  
志是城也誠繫於興甚重而禔於慶雲者至切也願徼惠一  
言以識不忘余辭不獲憶昔視草職方覽閱故籍凡更置郡  
若縣必吏於其土者詢謀惟審開陳其所便然後與之籌議  
疏請興生葉馨等走數千里稽首闕下其訴一方哀苦之狀  
若胥恃以有生者為情雖迫猶必咨之撫按叅之司府協之  
衆庶將舉而輟既寢而復者屢矣迨至成縣之日逾二十載  
外寇之患倉皇無備猝欲委而去之公之為斯城也數月之  
勞耳拯二十年倒懸之危貽千百年磐石之安其功德何如  
也然興之得縣奚啻與人之情惟爾密丁素多勇敢山川阻  
越當一郡隘躋之間徑路旁達閩歛前是之變屢為中蠹頻

生戒心今立其城矣專官而治依城而居萃焉知方將稱雄  
藩焉夫然後知得縣之可樂也陳君撫茲新邑百務聿興成  
城其最大者實宜有記若工費之自出與有事茲役者則記  
乎碑陰

神功泉葺亭記

陳克昌

神功泉去郡城西十五里路傍小石池廣僅尺許深稱之雖  
瞬息頃百餘人飲之不少竭終歲不汲不見泛溢其水極清  
而甘比凡水稍重最宜醞故盱江有麻姑酒之名洪武中同  
知梁君書有扁尋壞景泰初通判荆君碑諸石後覆以亭迄  
今百年半欲就圯嘉靖辛丑予謫茲盱明年秋祀姑祠偕太  
守朱公判倅李君節推方君往并祀三忠因有所謂武穆之  
議矣返觀於泉詢其所謂神功者道人曰山頂有竈昔葛仙



煉丹之井故名各汲飲方君好事取一罌權之如人稱因歎曰實聖境靈跡洞天福地也可無葺諸公曰吾所取獨異是蓋山下清淨之義茲可與徵志可與言政矣予曰然則茲泉其有益乎汨則亂可懼也遂葺其亭為記

羊角水堡記

歐陽德

江右列郡十三贛州邊東南當其上游外控汀漳潮惠閩廣之裔壤地參錯盤山藪盜時出沒剽劫而安遠會昌間則羊角水為之咽喉盜踰羊角水以西則襲長沙營掠雩都信豐贛諸縣為擾以北則攻會昌城西犯吉東侵撫建諸郡為擾故羊角水置堡屯戍卒隸會昌守禦千戶所與長沙營守備都指揮部兵相為聲援蓋古者遮要害遠斥堠之義而堡卒單弱盜來不能偵至不能禦則閉門自保堡傍居民千餘家

數遭毒虐守備官棄長沙營領所部寓會昌城中而堡益孤懸矣嘉靖癸卯大中丞東厓虞公撫臨茲土既擒捕諸縣逋寇乃復修長沙營使守備官部兵還居之次將議羊角水會居民羣聚來訴願自出力築城為衛而官董其成公移書兵備副使薛君甲薛君按行還言堡以衛民而僻枕山隈與民居相去里許緩急非益譬以民委盜而為之資糧館舍者也如城居民移戍卒城中民倚城為固藉卒為壯小警自可支猝有大警益增兵戍上之相便擣其巢窟下之奮武遏其奔突盜至無所掠欲深入又狼顧恐吾議其後制勝之上也報公公可聞之撫按撫按稱善申勅所司并心一力敬須公畫乃使守備官謝勅贛推官林天駿度地計功未行而民操畚鍤板榦俟矣已而木工以尋引斧斤至石工以椎鑿至塼埴

諸工亦各以其器至採山伐谷陶澗之濱木石瓴甃自餘諸物不督成集公出米於廩出金於府役給之稍工給之傭物給之直諸役競勸百堵皆作未踰時而城成周三千尺高三十尺有奇闢門三面公館中居屹然巨鎮表裏齒脣盜不敢窺郡縣吏士申民之情來屬文紀事始予惟事弗豫無備弗因罔功豫者先乎幾因者順乎人語曰虎攫而奔主人修門言無及也斯民蓋嘗傷於虎者智人覩未形况灼灼若是乎雖然弗專弗察弗斷弗果故專者事之幹也國家置總憲行臺控江湖閩廣之交簡命憲臣提督四省軍務所轄八府二州官方民事無所不得問者然而奉璽書行便宜曰兵機戎政張弛緩急四省倚為安危其最要者也此八府二州各統於其省之撫按官而撫按官治之視其他郡縣嘗畧以為兵

機戎政璽書有專責焉使一聽於提督不可參也為提督者或以其智之所及無巨細無所不問為撫按者亦以其位之所臨無詳畧無所不問故智分於泛察權撓於參差惟東厓公畧細而務大提綱以振目日惟簡軍實蒐卒伍申賞罰相機宜摘發姦慝落其牙距雍厥由蘖四履日靖軍聲大振猶懼變生所忽顛顛以求若將不暇乎其他故能智無遺慮炳幾灼情動罔弗時撫按諸公亦惟忠於謀國不私有已凡公所畫或聞而弗議或議而弗違若將拱手以仰其成故能乘時邁會不牽道舍之謀嗟夫慮精於一荒於泛功墮於參覈於需獨此城也乎哉是役也費不甚鉅而所關至重保障係乎一方而其道可施之天下故予樂誦其成以為理國者率是道而由之庶績可幾而凝非謂東厓之功為極乎此也

重建廣信府治廳事記

葉鏜

信故為州為路入明始改為廣信府其府治則肇於洪武初太守王公範之鼎建嗣是則金公銑王公翰陳公廷璉相繼增新拓故規制大備嘉靖壬戌年適罹鬱攸之災雖兩廡吏廨僅存而前後廳事則皆燬明年郡侯近山王公以水部正郎來莅郡事覩茲故址慨然興嗟曰茲政事之堂也雖時詘舉羸庸可緩乎乃謀之同寅僉以為然於是節縮浮費鳩材庀工伐木於山埴甃於野役民於隙不加賦不瘠肥民用不擾未幾而工事就緒經始於癸亥年八月落成於甲子年四月前堂後宇左庫右署煥然改觀矣乃謀礲石以紀歲月屬予志之會予以秩滿南還適觀厥成不敢以不文辭謹按信之為郡乃吳楚閩越之交實要區也其山川之奇特谿谷之

靚深秀實甲於諸郡北枕靈山南擁金屏東聯懷玉西引鷺湖而冰玉諸溪環滙停瀦如襟如帶昔人謂地上於饒俗美於廣良非虛語府治適當山水之中形勝為最往往莅茲土者率多元夫鉅人聲稱位望炳然於時其流芳於史冊膾炙於口碑者後先相望謂非山川之致士民之祐與予聞在昔民風儉樸勤生野人至有白首不識城市者而士大夫雅以清議為重至若侈靡囂訟之風浮薄之習俗羣恥之稍為近古今則寔異於昔矣化導之機顧不賴於上與郡侯王公豈弟宜民不激不隨而下車之初首軫民隱政先急務類如此二三君子又盡東南之美夫非更新之會乎是則皆可紀者王公名陳策字思董泰州人貳守王公名時拱字端夫同安人通守胡公名曉字東白績溪人推府李公名畿嗣字明卿

西海志 卷一百六十七  
三  
蘄水人其與勞於斯役者則於法得書因備錄之以紀其成云

修九江城記

余文獻

大江之西表裏湖江饒廣東引吳越袁吉西距湖湘惟九江縮轂其口左顧則扼湖以東制之右顧則扼江以西制之形勢為江西重我高皇帝為百姓請命時用謀臣計曰江州屬上游乃先取偽漢郡縣之洪武中始出京卒置衛亦以輔翼京師不獨為江西樹扞蔽也暨武廟朝專設憲臣駐其地意在先事經畧人重斯形勢無不重云嘉靖癸丑歲仁和抑亭陳公來鎮茲土乃首周覽險要深念曰此要害不繫一隅者卽具議謀諸當道大畧謂倭螫浙東時微眇耳率易之不深備彼毒螫海瀆諸郡始遍頃殘孽奔徽寧突出蕪湖口深入

之端見矣賊窺長江則與我共險窺湖口則全省動搖九江安得高枕哉宜增修城守以固民志時南直隸操江都御史史公江西巡撫都御史蔡公巡按御史高公皆是公議公乃檄前守張君指揮于君熟復計所費推官范永宇身督章程城周十二里舊五門無月城單露不可待敵乃令各築之九江衛築文明門德安縣築磐石門德化縣築湓浦門湖口縣築望京門彭澤縣築福星門始回互有重險城西南崇二丈五尺長六百三丈有堞蘄然人不能蟻附上工旣乃濬各濠城東址因山下有老鸛塘濬之北阻大江江齧庾樓磯侵城址乃伐石以實其齧西南帶以甘棠湖湖水直洩易涸城旣失險而風氣虧疎民鮮積貯公令守戰船卒築老馬渡隄障之隄堅水渚成巨浸可省千人守居民多負江城中奔曠且

苦江汲公令曰民比相鑿井飲佗有願徙莽曠者官為頓舍之民稍稱城守矣公先事經畧皆此類工始於乙卯歲八月兩閱歲而工就稽其費一千七百人金有奇軍民役者以三七役工甫興時公以內艱去浙新城方公繼成之是後城高池深形勢威暢風氣完固四民和輯民思公慮始之勞不釋已未歲公復莅江鄙江父老遮道迎公告曰今我民賴公幸而有城矣願公終始生我公曰精銳乘障之謂城公私積貯之謂城四隣必救之謂城吾為若屬終圖之父老頓首曰幸甚是年倭掠閩而城多陷民益德公云今守朱君曰藩同知汪佐通判邵元推官楊徵屬獻代父老言勒石以示來者獻曰愚睹於近事有扼腕者焉九江安慶比肩郡也往寧賊首難時安慶則堅守挫敵九江顧以全郡生靈付之賊手豈形勢

異哉典封疆者先事與弗先事爾形勢得人重明甚暨賊平以封疆之義繩九江與安慶以能守此論已見者假令九江不即破賊恐扼其喉吭決不敢出南昌敢踰九江而東乎此要害何等者當時賊踰九江鳴張肆矣南都雖有泰山之安如遺一矢於城下亦為策勝者羞乃一旦狼顧而竄不敢越安慶尺寸地豈非恐堅城制其後而奇衰之計遂沮是守也效高皇帝重上游意當在戰功右顧人未見爾未見者功反大何也不暴甲而解散之也故善經時者惟先事伐謀使內憂不出外憂不入耳豈論暴甲與不暴甲哉語曰虎豹託幽狐兔辟易言勝於無形也公未見之功類此皆宜記

靈雨祠記

吳希孟

嘉靖壬寅夏旱予以除職赴省取道歸萬年往還以身請一

西漢志 卷一百六十七  
夕夢天神告曰若能雨之守其祠吾否耶予曰諾至郡入謁父老卽壇所率僚屬徒步凡三日郡黎羅號戶衢厥聲嗷嗷予心如焚乃告於神符夢語協之卜再告曰神爲信城鎮夏相公具奏天子列祀大高元殿君相之意爲民祈報耳神寧忍負吾君吾相吾民吾守耶守有罪罪在守民何辜語畢陣雨簷溜嘉若勿克勝迄夜雷電風雲大雨如注四郊咸足民於谷神之嶺隙祀焉名曰靈雨蓋行祠也神在唐守信州沈丘人以祈雨靈山下化去其澤民無斃如此詎可忘乎

重修瑞州南城記

吳山

瑞城據錦水兩厓在南曰南城在北曰北城南城久廢而修復之可謂難矣按圖志舊城皆甃毀於宋元者再我明一統海內乂安百五十年至正德間盜起華林兩犯府治郡守鄺

公璠亟謀扞衛乃累土爲垣架木覆瓦事載沈叅議記中雖稱費省易成然歷歲未幾木朽瓦裂日就圯壞繼之者惟北城是重易以甃石南則寢久寢墮所存僅四門耳頃以倭夷報警天下郡縣多築城嘉靖庚申巡撫都御史何公遷按瑞閱視乃語分守叅政曹君忭分巡僉事何君大章曰瑞之北城大而南之市倍北可無城乎其議修築之或謂時詘舉羸姑增高北城公尤以南爲急議始協於時郡守韓公面承而身任之經畫周詳復白於巡按御史鄭君本立段君顧言咸如議乃諏日命匠陶甃伐石以是年六月二十四日始事予時在朝公具書余覽之喜甚曰此筠之福山之願也亟復書併以賜金五百助費比余罷歸見其規模次第業已就半會有廣寇侵吉及臨民詢奔避恨城之弗早完也寇去續集工

將潰於成居此者忽動浮言公遲之余曰三面旣城此復缺與無城同公乃斷然親詣尋入覲擢四川提學副使壬戌秋方公代至政先仁恕顧謂此不足難也爰稽故牘知費多虛冒工多詭慢乃悉覈之節約劑量惟公惟明匪疚匪棘及四十三年十月二十日告成費出撫按贖金若干兩餘皆府及三屬縣帑藏積貯與士民之樂助者共一萬七千四百兩有奇士民歡慶咸造余請曰是役也勞費甚大非韓公罔善厥始非方公罔成厥終惟二公先後一心為吾筠建茲偉績永有攸賴不可以無紀也余家在南幸觀厥成故不辭而樂為記俾刻石後之人享有安寧之樂知今日之難其無忘二公之功哉韓公名子允浙江慈谿人方公名邦慶南直婺源人

重修宜黃縣儒學記

羅汝芳

宜黃縣儒學舊在鳳山之陽嘉靖元年迺置今所雖視昔加壯然事出重遷工多簡畧庠舍久且就圯歲丙寅邑侯蘇溪俞君莅政之初首事德教迺捐俸修葺自文廟堂齋以及門廡煥然增觀數月工畢使狀求記且曰願有言以相勗也予閱狀得舊記二通一則南豐曾先生記初建於有宋一則一峯羅先生記重修於我明者也今君之功固於前修為有光不肖如余則安敢覲顏於二先生後邪然俞君之嘉惠後學意則未可虛請以前名言為諸生申之夫謂先王聯學校羣師儒明章禮教共相循習其大要務使人人學其性不獨防其邪僻放肆焉南豐之稱述古先誠博觀槩舉而識其大者矣一峰則於邪僻之防利欲之肆獨加意焉又何其嚴切而篤實也哉夫性之在吾人一也親則知愛焉兄則知敬焉孩

提顧咸能之至其長則或成德於聖賢之歸或悖淫於不肖之極相去不啻倍蓰者何哉學不學之故也然則學者率吾感應之常以端其好惡之分又察乎彝倫之懿以明慎於出入之方則知先王禮訓之陳典常張設周至詳密非有益於所性也固將盡吾愛敬之良以同於聖賢之歸焉耳其所欲所好有甚於勢利之私萬萬者其時之所際或出或處皆將脫然蟬蛻於汙濁之表豈復有一毫可入於其中哉豈盡性之外又有他學哉是故必如斯而後二先生立言之旨爲無負而俞君嘉惠後學之意亦爲有成也惟諸生其共勗之俞君括蒼人名世美蘓溪其別號云

復古書院記

聶豹

學有古今故人有古今治亦有古今欲還古治當求古人欲

求古人當復古學學之古何所始乎執中一語萬世心學之源也中者何也天地之心也人得之而爲人之心其未發也五性具焉天下之大本也本立而天下之能事畢矣惟夫不知中之爲未發也索之於念慮探之於事爲逐逐焉役於外以襲之而天德王道之幾於是焉息陽明先生悼俗學之塗炭生民也毅然倡道東南而以良知爲宗蓋良知者未發之中也不學不慮自知自能故曰良知有志之士聞風而興者時惟江西爲盛江西之盛惟吉安吉安之盛惟安福故書院之建惟安福有之題曰復古者期有事於古人之學而學焉者也書院在邑治南門外一里許卽古學廢址而創之東廓先生力倡其成主之者松溪程先生也松溪以內翰言事謫官信宜起知安福好古宣教適符東廓始事於某年月日訖



工於某年月日書院凡若干楹層門敞戶復寢崇堂齋舍泡  
溜几榻器用無弗備又有田若干畝以資會饌之費會有期  
司會有長會凡若干人若某等十數輩皆面承良知之教與  
東廓同遊者雖所詣有淺深要皆斐然成章而協贊書院之  
成咸有力焉

懷玉書院記

王宗沐

三代之隆治舉法信庠序黨比之居鐘鼓管籥簪裾揖遜之  
教不在其起居則在其應接其為物博其為事詳士當其時  
耳目純繹而志意安習宜其才之博碩而治之綦隆也自周  
道不著而教益廢學校之設既不足以維持士習而又雜以  
辭章聲利之制於是又有書院之設其教既不專於鐘鼓禮  
樂而其地又不詳於閭里黨比於是往往擇深山僻坳靜深

以為肄業之所士之居其中者既不係於有司程課之督則  
號為有志而又其平素酣暢於聲利拘桎於奔走心煩氣倦  
而得此以為之適若饜梁肉者咀疏素羈籠鞢者翔寥廓宜  
其好之深聚之衆而地因以不廢也古之聖賢途之人皆可  
為而九九陋巷之地繩樞圭竇之居乃至在市居朝無非學  
者今有司排擊異氏表章正學不憚以改作為功方以是為  
鐘鼓揖遜閭里黨比之教其來集者固當念廢興之不恒察  
心跡之相應求所以仰副諸公嘉育之意夫然後可與居深  
山也已院之殿堂祠舍典籍器物田地山畝形數甚煩及先  
後有事於山者姓名具在志皆不勝載載其大者嘉靖四十  
年歲次辛酉季夏立石

高氏重修公堂記

何廷仁

高氏零之繁族也其居去城西里許舊嘗有堂合族以修世睦正德庚午燬於兵族之人遂以離散高公顯志懼無以連屬疎遠將視族人而途也謀之伯兄顯用公將復新之顯用尋卒其子攀等協贊以成厥志鳩工於嘉靖壬午畢於癸未其從子汝承與予為莫逆交徵言以記義不獲辭因推合謀營構之意將以告夫高氏之族使知今日汲汲以復斯堂正不徒貽燕子姓以侈閭里之觀而已將使登斯堂者惟爾祖是思敦叙昭穆以洽倫理崇祀燕享以長恩愛勗力賙卹以隆媯睦執禮通問以修和好漸習淳龐以守敦朴父父子子兄弟弟夫夫婦婦世相保而和睦爾祖作堂之意不在茲乎不然雖竭經營肯構之勞是亦世俗侈觀之具爾矣於垂訓乎何有汝承曰子可謂達吾祖之心矣請書之以昭來世

修紫陽書院記

趙郡

南豐故有書院在城之東隅宋曾子固為之記至元末燬於兵燹遺址今為民居則書院廢於豐者數百年矣嘉靖壬寅金陵向侯來視縣事以東門外昭陽祠祀非其鬼命撤像為今書院改故祠為堂堂顏曰崇文中肖朱子像歲祀之堂之前闢其奧為階東西廡齋舍門屋跨通衢門之上顏曰紫陽書院其大較若此迨丁巳歲峒寇蹂躪江籬書院用棲武弁十餘年內橫戈豎戟廢溷其中堂龕几席據作家私櫺楹窗扉析為燎榘牆頽壁缺巋然存者楹柱而已隆慶戊辰秋東粵愚圃金侯甫下車眎縣及書院喟然曰晦庵嗣續孔孟崇廟祀之紀思也顧圯壞狼籍至此則所設奚以哉乃圖新之遂召耆民襄其役鳩工度材悉出已俸一不及民數月而功

告成屬余記之余謂金侯之政識大體矣時論以戢兵簡訟  
為長人者之責不知謹庠序之教崇先哲以矜式士類乃所  
以使民無訟而無所用其武者也可無述乎因究其本而為  
之言曰自堯舜迄今治亂匪一邪正之辨皆折衷於朱子今  
書院廢而復修之者我侯得無意哉蓋吾儒與異端殊教也  
絃歌與強暴異情也然而彼卒不能勝此者以經常之理俎  
豆之事藝極所陳其感人者速也朱子集諸儒之大成倡明  
正學慨世之學者失小學工夫故其教人自食息起居以至  
祀天饗帝一以主敬為本則先生之學真足以紹百王繼千  
聖正人心扶世教千載之下嘉言善行載在典籍者如日月  
之經天斯文宗主未有舍此而他求者也侯修廢舉墜固將  
使後生晚進日覩其遺像有所感發興起措之文章事業朝  
廷物色得真才而用之使邦人知豈弟作人之意而頌金侯  
之功不衰顧不偉歟若曰歲時將享徒多其儀文章縫之士  
出入是門者徒異其冠服侈談道德為媒利之階宗慕禪寂  
為見性之地則匪惟乖侯之初意即起朱子於今日亦將在  
門牆則麾之矣

高士亭記

熊 浹

高士亭者北瀝徐君雪窗所建以祠其先孺子者也孺子當  
漢季衰亂隱居吾豫章城中葆貞獨善屢辭徵辟乃有南州  
高士之稱歷吳晉唐宋以來凡吏於茲土者莫不欽慕其風  
節修宅表墓建祠以致崇重之意若今東湖之濱所謂高士  
祠者蓋國初太守許君方所立則既載諸傳誌而稱聞四方  
矣北瀝之徐系出孺子元至正間有號永愚者以文行獲交

諸名公卿松雪趙學士嘗大書南州高士後人永愚八字以贈之實雪窗六世祖也徐族固有孺子祠年久頽廢雪窗慨焉乃於嘉靖某年別立亭於所居之北凡若干楹中肖孺子像以為妥靈揭虔之地前有門左右有廡四周鑿池環之而橋其南以通出入池之阨雜植槐柳外復蔽以周垣波光樹色日夕相掩映其規制景象蓋將與東湖之亭相埒矣既乃繪圖示予請文以記夫孺子南州一處士耳初無位勢勳勳可以震動當時垂庇後世而顧使人稱思至於今不忘者無亦以其行義風節誠足以廉頑立懦有裨世教而秉彝好德之在人人者固宜有曠百世越千里聞被風聲而其崇仰之誠亦自有不能已者也而況吏於其土得邇其聲跡者乎又況生於其族而稱為之後人者乎此雪窗之所以有是舉而

於尊祖之仁興賢之義蓋實兼之矣然表樹既嚴歲事有恪徐之子姓登斯亭也寧不有惕然興感思自力於善以求無忝於其先者是寓崇往勸來之意於其間也已君名樟字本著雪窓其號也孝友義信之行孚於家推重於鄉黨蓋足稱其為高士後人而徵諸此舉則固非所謂冒飾虛名者矣是為記

南昌府儒學記

魏良弼

南昌府學會秀儲英植材陶器其來已非一日而士之居是學者景行先哲追蹤遺矩所以學為士為賢為聖求所以盡為人之道者雖未必人人盡同而可法於後來者寧少哉古今題刻炳若前日可稽也今士入學卽令展謁先師然後登堂明倫立標定趨亦以聖人人倫之至望之耳故曰三代之

學皆所以明人倫也國初創造府州縣建學養士彰勤飭惰  
殿幽陟明悉責成於守令提調故士稱弟子員者視守令猶  
父母也不曰作之君作之師哉是故文翁化蜀風同鄒魯伏  
恭令杭遂成伏學武城絃歌流風可想古今猶一揆也故多  
收作人之功詩云豈弟君子民之父母有以哉厥後更代靡  
常提調未稱遂謂守令難以責成正統間乃設督學官於按  
察總領之守令提調之責遂有所諉而教亦不專矣夫道有  
否泰政有隆替待其人而後行也今不曰人非而曰官弊何  
異因噎廢食耶督學今有專勅故責成守令者視國初少異  
而士之宗提調亦視督學為少遜也夫士既視守令為父母  
卽視督學猶高曾也今士不授教於提調而惟督學是宗是  
猶宗子舍祖禰而宗高曾原本雖同其如地遠而分不親愛

博而情不專何如古以鄉三物教萬民卽今守令之職按察  
明刑以弼教猶古糾以八刑之官今制三歲賓興猶古也未  
聞專以三物迪士亦未聞糾以八刑名同而實異守令之責  
分先王之風微矣學大修於弘治戊子繼是修者屢見宮牆  
外隘巷一道竟未有為展拓計也三易壬子於今矣茲幸三  
溪饒公來守是邦德以道民儒以飭吏門無通介守不爽節  
蓋欲起文伏之風於千古流休聲於無窮也責固嫌於安諉  
事每忌於自專故令多士引發而鳴諸當道自待風亦厚矣  
惟時若都御史翁公御史蕭公咸是公議遂以公地易民居  
得地東西若干丈南北若干丈設屏樹坊宮牆廟貌煥然一  
新道遠勢雄目豁心泰自開國以來所未備也今備於公手  
仍以壬子紀年寧非一大數耶公名相廣東大埔人乙未進

士

都昌縣城記

萬浩

江右諸水北匯鄱陽湖都昌倚山枕湖實全省要會之地而風濤洶洶每慮不測此城之建視他邑尤切焉自嘉靖以來屢議建築莫之克行越三十六年有令歐君益查奉上司會案增培窪隰凡八設置水關凡七城址既定隨卽沮止再越歲中丞吉陽何公復檄郡守役方半各去徙靡常四十一年春霖久注頽圯過半秋八月今兵侍柏泉胡公駐車旰江控制閩廣而經營境土慮周千里之外以都昌濱湖孤邑大不可無城移文督成諄復不一大叅王公育泉駐守南康涉濤冒雨數詣城所面致勸諭有若家事郡守于公督率惟虔立為程限邑令周君希韶受成秉度夙夜罔怠均下糧以經費

分里遞以領役未再月而工告成焉城計九百零五丈五尺高二丈厚與高稱城樓六座兵馬廳五所窩館二十共費白金若干兩父老樂觀之謀諸周令以記屬予予謂茲城自江藩論之乃中流之砥障從外境望之為北門之鎖鑰頃聞其功甫畢而叛兵素三之黨突至此寇釀禍未能一旦滅之今也盼高堅而趨下流致我舟師克成大捷邑得以安堵詎非茲城之功哉且閩廣之境距此千里餘其軍門移文之催速與守道防禦之周悉俱在數月前何其先事之弗爽奉行篤信之弗二耶抑都昌之財力非能加於昔也何其曠代莫舉之功而今日速成之若此耶噫嘻天下無難處之事無不可為之時蓋惟俊傑在上則心同力協舉罔不勝其難者易矣是知茲城之功要在得人予是以記

臨江府徙建新學記

楊標

臨江郡學舊麗城城當贛袁二水衝蓋歲徙築竟逼學廟嘉靖壬戌江陵陳公大賓以叅知藩政開府吾郡銳意文教謁先師畢四顧歎曰學門在水濱是尚可仍乎力命遷之檄郡守蒲圻謝公鵬舉與定方畧會有浮屠以燬廢且距學近公故諳百家相其區曰善蠲日筮事鳩工掄材埽燼薙莽平陂闢隘衆營畢集官師陳能越數月而新學告竣釋菜禮成公遷去明年謝亦遷去今晉江陳公選清江令洪州王君圻先後至皆嘉意斯文鴻規底績云費一出之贖金與郡守所助民無糜財工用徭夫出練兵之休力人不告疲材石則括舊在與增致者董役為清江丞刁鴻漸經始於壬戌夏五月落成於冬十一月左為先師廟東西為兩廡前為戟門櫺星門

右為明德堂東西為學官齋前為學門廟左為啓聖祠為尊經閣為名宦祠堂右為敬一亭為鄉賢祠前後二池近者為日池池上建石橋三橋首建石枋三橋左為天衢閣右為漱玉井左稍遠為文峯樓敞邃礮密丹雘炳煥捐貲礮石徵標言記其事余愧謏陋謝不敏顧義安辭竊惟三代之隆六藝已陳四科之賢文學不廢言語文字曷為儒累顧師所以教與弟子所以學何如耳臨之先哲文獻具存或茹潔於獨或擢芳於要或居夷抗素或見危遂志或表著政事或精邃經術遡瞻山川胥足顯靈祕而風來葉也然考其夙夜永譽醇白不滓者道德為先勛業次之文章又次之名實本末之辨此其故可立覩矣諸生誠無負於明時則必有豪杰之士應運而出嗣休前聞無疑也僭不自揆敬書之石以識成功且

西江志  
卷一百六十七  
使觀者知是役之有關於風教重且大如此也

西江志卷第一百六十七



